




元和郡縣圖志卷第五

河南道一

河南府

開元戶一十二萬七千四百四十  
元和戶一萬八千七百九十九

鄉二百



禹貢豫州之域在天地之中故三代皆為都邑陽翟夏城  
禹都也偃師西亳湯都也周成王定鼎於郊鄩使召公先  
相亳乃卜澗水東瀍水西是為東都今苑內故王城是也  
又卜瀍水東召公往營之是為成周今河南府東故洛城  
是也至赧王獻地於秦莊襄莊襄王立為三川郡三川伊  
洛河也  
漢改為河南郡後漢光武建武元年入洛陽遂定都焉及  
董卓逼遷獻帝西都長安盡燒洛陽宮廟後又都為魏文

帝受禪亦都洛陽陳留王以司隸校尉所掌置司州領河南河東河內弘農平陽五郡晉武受禪司州不改永嘉初劉曜叛亂司州沒胡後又沒於石勒東晉穆帝永和元年桓溫入洛陽置河南郡宋武北平關洛復置司州後魏孝文太和十七年六宮文武盡遷洛陽改爲河南尹至周宣帝移相州六府於洛州以爲東京隋文帝改六府爲六尚書省又置河南道行臺省仁壽四年煬帝詔楊素營東京大業元年新都成遂徙居今洛陽言是也其宮北據卬山南直伊闕之口洛水貫都有河漢之象東去故城一十八里初煬帝嘗登卬山觀伊闕顧曰此非龍門耶自古何因

不建都於此僕射蘇威對曰自古非不知以俟陛下帝大悅遂議都焉其宮室臺殿皆宇文愷所創也愷巧思絕倫因此制造頗窮奢麗前代都邑莫之比焉又改洛州爲豫州罷牧三年罷州爲河南郡置尹四年改東京爲東都十四年復置洛州隋亂王充僭號稱鄭改爲司州武德四年討平充復爲洛州仍置總管府其冬罷府置陝東道大行臺太宗爲大行臺尚書令九年罷臺置洛州都督府貞觀十八年廢府顯慶二年置東都則天改爲神都神龍元年復爲東都開元元年改洛州爲河南府天寶元年改東都爲東京至德元年復爲東都

府境東西六百二十一里

八到西至上都八百五十里

東至鄭州二百八十里

東北至懷州一百五十里

西至陝州三百五十里

東南至汝州一百七十里

東南取崕嶺路至陽翟縣二百四十里

從縣至許州九十里

貢賦 開元貢 綾絹 白瓷器

管縣二十六洛陽 河南 偃師 緱氏 鞏縣

伊闕 密縣 王屋 長水 伊陽 河陰

陽翟 潁陽 告成 登封 福昌 壽安

澠池 永寧 新安 陸渾 河陽 温縣

濟源 汜水 河清 河陽等五縣今權隸河陽三城節度

洛陽赤本秦舊縣歷代相因貞觀六年自金墉城移入郭內毓德坊今理是也神龍初改為永昌尋復舊號故洛陽城在縣東二十里按華延雋洛陽記云洛陽城東西七里南北九里洛陽城內宮殿臺觀府藏寺舍凡有一萬一千二百一十九門自劉曜入洛元帝渡江官署里閭鞠為茂草後魏孝文太和十七年幸洛陽巡故宮遂詠黍離之詩為之流涕觀石經仍定邊都而經始洛京十九年九月新都始立於是六宮文武盡遷洛陽

洛水在縣西南三里西自苑內上陽之南彌漫東流宇文

元利君鼎志 卷五  
愷斜堤束令東北流當水衝捺堰九所形如偃月謂之月坡今雖漸壞尚有存者

河南縣 赤本漢舊縣後魏靜帝改爲宜遷縣周宣帝復爲河南隋仁壽四年遷都移縣於東都城內寬政坊即今縣是也永昌元年以明堂初成改爲合宮縣神龍初復舊二年復爲合宮景雲初復舊

洛水在縣北四里伊水在縣東南十八里

瀍水在縣西北六十里禹貢曰伊洛瀍澗既入於河孔安國注曰出河南北山水經云源出河南穀城縣北今驗水西從新安縣東入縣界

天津橋在縣北四里隋煬帝大業元年初造此橋以架洛水用大船維舟皆以鐵鑠鈎連之南北夾路對起四樓其樓爲日月表勝之象然洛水溢浮橋輒壞貞觀十四年更令石上累方石爲脚爾雅牛斗之間爲天漢之津故取名焉

中橋咸通三年造累石爲脚如天津橋之制

通津渠在縣南三里隋大業元年分洛水西北名千步磧渠東北流入洛水謂之洛

偃師縣 西南至府七十里 本漢舊縣帝嚳及湯盤庚並都之商有

二亳成湯居西亳即此是也至盤庚又自河北徙理於亳

商家後此而改號曰殷武王伐紂於此築城息偃戎師因以名焉天寶七年四月河南尹韋濟奏於偃師縣東山下開驛路通孝義橋廢北坡義堂路焉

北邙山在縣北二里西自洛陽縣界東入鞏縣界舊說云北邙山是隴山之尾乃衆山總名連嶺修亘四百餘里首陽山在縣西北二十五里

盟津在縣西北三十一里

緱氏縣

西北至府六十三里

本漢縣古滑國也左傳曰秦師滅滑其後屬晉至秦漢爲縣因山爲名大業十年移據公路澗西憑岸爲城即今縣是也

緱氏山在縣東南二十九里王子晉得仙處

轘轅山在縣東南四十六里左傳欒盈過周王使後出諸轘轅注曰緱氏縣東南有轘轅關道路險隘凡十二曲將去復還故曰轘轅後漢河南尹何進所置八關此其一也鄂嶺坂在縣東南三十七里晉八王故事曰范陽王保於鄂坂後於其上置關

洛水自西洛陽縣界流入

曹城在縣東一里曹操與袁術相拒築城於此

袁術固一名袁公塢在縣西南十五里宋武北征記曰少室山西有袁紹固可容十萬衆一夫守隘萬人莫當

公路壘在縣南三里袁術與曹公相拒處

鈞鑠故壘在縣東北七里宋書司馬休之從宋公西征營於柏谷塢西即此壘相連如鎖因以為名也

鞏縣西至府一百四十里古鞏伯之國也春秋晉師尅鞏戰國時韓

獻於秦至漢以為縣屬河南郡大業十三年李密自潁川率群盜十餘萬襲破洛口倉因據鞏縣仍築城斷洛川包南北山周迴三十餘里屯營其中後為王充所破縣本與成臯中分洛水西則鞏東則成臯後魏并焉按爾雅鞏固也四面有山河之固因以為名  
天陵山在縣東南六十里

黃河西自偃師縣界流入河於此有五社波又有五社津後漢朱鮪遣賈強從五社津波是也

洛水東經洛汭北對郎耶渚入河謂之洛口亦名什谷張儀說秦王下兵三川塞什谷之口即此也

伊闕縣北至府七十里古戎蠻子國漢為新城縣屬河南郡周武

帝時屬伊川郡開皇十八年罷郡改為伊闕縣

伊闕山在縣北四十五里兩山相對望之若闕伊水流其間故名

陸渾山俗名方山在縣西五十五里

伊水西自陸渾縣界流入左傳秦晉遷陸渾之戎於伊川

伊闕故關在縣北四十五里何進八關之一

密縣西南至府一百十里本漢舊縣古密國也春秋諸侯伐鄭圍新

密漢屬河南郡隋大業二年廢十二年又置武德三年於

此置密州四年廢州以縣屬鄭州龍朔二年割屬河南府

爾雅曰山如堂者曰密因以為名

大隗山在縣南東五十里本具茨山黃帝見大隗於具茨

之山故亦謂之大隗山灑水源出於此

馬嶺山在縣南十五里洧水所出

王屋縣東南至府一百里本周時邵康公之采邑漢為垣縣地後

魏獻文帝分垣縣置長平縣周明帝改為王屋縣因山為

名仍於縣置王屋郡太和元年又為西懷州開皇三年改

為邵州大業三年廢邵州以縣屬懷州明慶二年割屬河

南府

齊子嶺在縣東十二里即宇文周與高齊分據境之處也

黃河在縣南五十里

王屋山在縣北十五里周迴一百三十里高三十里禹貢

底柱析城至於王屋是也

析城山在縣西北六十里峯四面其形如城有南門焉故

曰析城

長水縣東至府二百里本漢盧氏縣地後漢晉宋不改後魏宣



武帝分廬氏東境置南陝縣屬弘農郡西魏廢帝改為長淵義寧元年以犯高祖廟諱改為長水貞觀八年自號州割屬穀州明慶二年屬河南府穀州今新安縣所理是也

伊陽縣北至府二百六十里本陸渾縣南界之地先天元年割置伊

陽縣

伊水路在縣西南出鸞掌山東流水經云出南陽魯縣蔓蕓山東北過陸渾縣南又東北過伊闕中又魯北入於洛多雨暴漲諸峽束水之處其高或七八丈故伊闕石壁有石銘云黃初四年六月二十四日辛巳大水出高四丈五尺

銀鈿窟在縣南五里今每歲稅銀一千兩

河陰縣西南至府二百三十里本漢滎陽縣地開元二十二年以地

當汴河口分泥水滎澤武陟三縣地於輸場東置以便運

漕即侍中裴耀卿所立初耀卿為宣州刺史開元十八年

因朝集上便宜曰竊見江淮諸州所送租庸等本州正月

二月上道至揚州入斗門即逢水淺停留一月已上四月

已後始度淮入汴多屬乾淺又般連停留至六月七月方

至河口即遇黃河漲溢不得入河又湏停一兩月待河水

較小始得上河入洛即又漕洛乾淺船艘不通計從江南

至東都停滯日多得行日少艱辛欠折因此而生伏見國

家舊法河口元置武牢倉江南船不入黃河即於倉內便貯也鞏縣置洛口倉從黃河不入漕洛即於倉內安置爰及河陽倉柏崖倉太原倉永豐倉渭南倉節級取便例皆如此水通利則隨近運轉不通即且納在倉不滯遠船不生隱盜每年剩得一二百萬石即數年之外倉廩轉加至二十二年以耀卿為相兼轉運都使於是遂分至置河陰縣及河陰倉河清縣置柏崖倉三門東置集津倉三門西置鹽倉三門北鑿山十八里陸行以避湍險自江淮來者悉納河陰倉自河陰候水調浮漕送含嘉倉又取曉習河水者遞送太原倉所謂北運也自太原倉浮渭以實關中凡三

年運七百萬石省脚三十萬貫及耀卿罷相後緣北路險澁頗為隱欺議者言其不便事又停

汴渠在縣南二百五十步亦名葭蕩渠禹塞滎澤開渠以通淮泗後漢初河汴決壞明帝永平中命王景修築渠堤十里立一水門令更相注洄無復潰漏之患自宋武北征之後復皆堙塞煬帝大業元年更令開導名通濟渠自洛陽西苑引穀洛水達於河自板渚引河入汴口又從大梁之東引汴水入于泗達于淮自江都宮入于海亦謂之御河河畔築御道樹之以柳煬帝巡幸乘龍舟而往江都自揚益湘南至交廣閩中等州公家運漕私行商旅舳艫相

續隋氏作之雖勞後代實受其利焉

汴口堰在縣西二十里又名梁公堰隋文開皇七年使梁  
睿增築漢古堰過河入汴也

三皇山亦曰巖高山上有三城即劉項相持處春秋左氏  
傳曰晉師在敖郟之間亦此也

陽翟縣西北至府二百四十里本夏禹所都春秋時鄭之櫟邑韓自

宜陽移都於此秦為潁川郡楚漢之際韓公子成為韓王項

羽殺成立鄭昌漢元年又誅昌立橫野君信六年徙信太

原公復置潁川郡領縣二十里陽翟潁州屬縣後魏復置

陽翟郡開皇十六年廢郡置嵩州以縣屬焉大業三年隸

襄城郡武德中人隸嵩州貞觀元年廢入許州建都後改

屬河南府

鈞臺在縣南十五里左氏傳曰夏啓有鈞臺之饗也

潁陽縣西北至府九十里古綸氏縣本夏之綸國也少康之邑在

漢屬潁川晉省後魏太和中於綸氏縣城置潁陽縣屬河

南戶又分潁陽置瑤陽縣開皇六年改瑤陽為武林十八

年又改為綸氏大業元年改為嵩陽載初元年又改為武

林開元十五年改為潁陽

大石山一名萬安山在縣西北四十五里

倚箔山望之如立箔山西北崖下有鐘乳隋時充貢

陽乾山在縣東二十五里潁水一源出陽乾山

大谷口在縣西北三十五里孫堅停兵大谷距洛陽九十里即此谷

大谷故關在縣西北四十五里何進八關之一也

告成縣 西北至府一百七十里

本漢陽城縣屬潁川郡因陽城山為名後魏置陽城郡屬司州開皇三年廢郡以縣屬洛州十六年於此置嵩州仁壽四年省嵩山以縣屬河南郡萬歲登封元年則天因封中嵩改名告成許由山在縣內十三里

嵩高山在縣西北二十三里

少室山在縣西北五十里

陽城山在縣東北三十八里

鬼谷在縣北五里即六國時鬼谷先生所居也

測景臺在縣城內西北隅高一丈開元十年詔太史監南宮說立石表焉

登封縣西北至府一百三十五里

本漢嵩高縣武帝元封元年置以奉太室後省入陽城累代因之高宗將有事於中岳分陽城緱氏置嵩城縣萬歲登封元年則天因封岳改為登封

嵩高山在縣北八里亦名方外山又云東曰太室西曰少室嵩高總名即中岳也山高二十里周迴一百三十里

少室山在縣西十里高十六里週迴三十里潁水源出焉

潁水有三源石水出陽乾山之類谷中水導源少室左右水出少室南溪東合潁水

開母祠縣東北七里漢書武帝祀中嶽見夏啟母石是也應邵云啓生而母化為石淮南子亦同嵩山記陽翟婦人今龕中鑿石像其名漢安帝延光三年立

福昌縣 東至府一百五十里

古宜陽地春秋時屬晉七國時屬韓漢以為縣屬弘農郡後漢建武三年馮異被赤眉於崤底餘眾走向宜陽帝自

征之赤眉君臣面縛即此地也義寧二年於此置宜陽郡武德元年改為穀州改宜陽縣為福昌縣取縣西隋宮為名明慶二年廢穀州以縣屬河南府今縣城即魏一全塢城東南北三面天險峭絕後周置重兵於此以備高齊女几山在縣西南三十四里

壽安縣 東北至府七十六里

本漢宜陽縣地後魏分新安置甘掌縣隋開皇三年以縣屬熊州十六年改為穀州仁壽四年改名壽安縣貞觀七年改屬河南府

石墨山在縣西南三里山石如墨可以書

洛水西自福昌縣界流入  
少水今名慈澗水出縣北

八關故城在縣東北三十里後漢靈帝中平元年以河南  
尹何進為大將軍將五營士屯都亭置函谷大城伊闕大  
谷轅轅旋門平津孟津等八關都尉官理於此

永濟橋在縣西十七里煬帝大業三年置架洛水隋亂毀廢

貞觀八年修造舟為梁長四十丈三尺廣二丈六尺

澠池縣 東至府一百五十里

本韓地哀侯東徙其地入秦漢以為縣屬弘農郡隋文帝

時屬熊州 熊州今河南府 福昌縣是也 十六年改屬穀州明慶二年廢

穀州縣屬河南府

廣陽山亦名澠池山在縣東北五十五里

穀水南去縣二百步東經秦趙二城俗謂之俱利城

東城在縣西十三里

西城在縣西四十里昔秦趙會於澠池之處

大塢故城在縣北十五里後魏武帝入關使行臺楊騰出關

安撫騰因舊城置大塢鎮

永寧縣東至府二百里

漢澠池縣之西境後漢晉宋不改後魏文帝於今縣東四

十里置北宜陽縣屬宜陽郡廢帝二年改為熊耳縣義寧

二年置永寧縣屬宜陽郡貞觀元年改屬河南府

二嶠山又名欽崙山在縣北二十八里春秋時秦將襲鄭蹇叔哭送其子曰晉人禦師必於嶠嶠有二陵其南陵夏后臯之墓北陵文王之所避風雨必死是間漢建安中曹公西討巴漢惡其險更於山下路側有石銘曰晉太康三年弘農太守梁柳脩復舊道西征記嶠上不得鳴鼓角則風雨總至自東嶠至西嶠三十五里東嶠長坂數里峻阜絕澗車不得方軌西嶠全是石坂十二里險絕不異東嶠熊耳山在縣東北四十五里後漢世祖破赤眉積甲宜陽縣城西與北山齊按禹貢導洛自熊耳在商州上洛縣界

與此別也

穀陽山在縣西北五十五里漢書地理志穀水出穀陽山回谿俗名迴坑在縣東北三十六里馮異與赤眉戰敗於此壘書勞曰始垂翅於迴谿終奮翼於澗池可謂失之東隅收之桑榆

新安縣

東至府七十里

本漢舊縣屬弘農郡晉改屬河南郡後魏屬新安郡周武帝保定三年省新安郡又於今縣理置中州建德六年省中州又置新安郡隋開皇六年改置穀州貞觀元年新安屬河南府

穀水在縣南二里國語曰穀洛闢壤王宮是也縣城本名通洛城周武帝將東封令陝州總管尉遲綱築此城以臨齊境

白超故城一名白超壘一名白超塢在縣西北十五里壘當大道左右有山道從中出漢末黃巾賊起白超築此壘以自固東魏修築爲城因名白超城

函谷故關在縣東一里漢武帝元鼎三年爲楊僕徙關於新安按秦函谷關在今陝州靈寶西南一二里靈寶縣以其道險隘其形如函故曰函谷項羽坑秦降卒於新安即此地今縣城之東有南北塞垣楊僕所築

慈澗故鎮在縣東南二十里周武帝保定六年置武德三年討王充前軍鎮此太宗以輕騎擊破之充拔鎮歸於東都

陸渾縣

東北至府一百三十里

本陸渾戎所居春秋時秦晉遷陸渾

之戎於伊川至漢爲陸渾縣屬弘農郡後屬河南尹後魏改爲伏流縣大業元年省伏流縣移陸渾縣於今理

三塗山在縣西南五十里左傳曰四嶽三塗陽城大室九州之險

明臯山在縣東北十五里

伊水在縣西南自虢州盧氏縣界流入



伏流城即今縣理城東魏孝靜帝武定二年所築以城北焦澗水伏流也下西有伏流坂因以為名

河陽縣 西南至府八十里 自河陽已下至河清等五縣今權隸三

城節度本周司寇蘇忿生之邑後為晉邑在漢為河陽縣

屬河內高齊省入溫軹三縣開皇十六年分溫軹二縣重

置屬懷州武德四年平王充後割屬河南府

南城在縣西四面臨河即孟津之地亦謂之富平津後魏

使高永樂守河南以備西魏即此也周隋為官貞觀置鎮

中潭城東魏孝靜帝元象元年築之仍置河陽關天寶已

前亦於其上置關縣西南十三里古遮馬提即後魏爾朱

榮殺朝士千三百餘人於此

謹按至德中史思明之來寇也時李光弼已至東都聞思

明將至乃移牒留守及河南尹并留司官坊市居人令悉出

避寇空其城乃率麾下士馬數萬東守河陽三城拒逆賊

賊黨初謂光弼自洛而西及聞保河陽出其慮外疑懼久

之不敢犯宮闕光弼訓練招集威聲大震賊雖入城憚光

弼兵威南不出百里西不越畿內陝州得修戎備關隘無

虞皆光弼保河陽之力故自乾元已後常置重兵貞元後

加置節度為都城之巨防造浮橋架黃河為之以船為脚

竹篲亘之晉陽秋云杜元凱造河橋於富平津即此是也

船箕出洪州

温縣 西南至府百三十里

本周畿內司寇蘇公之邑春秋周襄王賜晉文公漢以為縣屬河內郡大業十三年自故温移於今所皇朝建都割屬河南府

濟源縣 南至府一百二十里

古軹邑屬魏秦昭王時代魏取軹漢文帝時封薄昭為軹侯屬河內郡開皇十六年分軹縣置濟源縣屬懷州以濟水所出因名明慶元年割屬河南府

濟水在縣西北三里平地而出有二源其東源周迴七百

步深不測西源周迴六百八十五步深一丈皆繚之以周

墻源出王屋山山海經云王屋之山瀰水出焉郭璞注云

瀰流水之源尚書禹貢云導沅水東流為濟入於河溢為

滎孔安國注云濟水入河並流十數里而南截河又並流

數里溢為滎澤按禹貢導沅水東流為濟入於河溢為滎

東出於陶丘北又東至於荷又東北會於汶又北東入於

海顏師古云沅水而為濟截河內為滎澤陶丘今在曹州

定陶西南荷澤過荷澤又與汶水會北折而東入於海也

按流水出今王屋縣山東流至濟源縣而名濟水滎澤在

今鄭州滎澤縣定陶今曹州濟陰縣也荷澤在今兗州魚

臺縣汶水出今兗州萊蕪縣然濟水因王莽末旱渠涸不復截河南過今東平濟南淄川北海界中有水流入於海謂之清河實荷澤汶水合流亦曰濟河蓋因舊名非本濟水也而水經是和帝已後所撰乃言濟水南過滎澤至於乘氏等縣一依禹貢舊道斯不詳之甚也酈元又從而注之尤爲批繆矣

百尺溝在縣東北六里引濟水溉灌仁壽三年置初分功人穿十丈故名百尺溝

河清縣 南至府六十里

本漢軹縣地縣西有拍崖故城即東魏將侯景所築武德

初於城東置太基縣八年省咸通四年重置先天元年以犯玄宗廟諱改名河清

汜水縣 西南至府一百八十里

古東虢國鄭之制邑漢之成臯縣一名武牢穆天子傳曰天子獵於鄭國有獸在葭中七萃之士擒之以獻天子命蓄之東隅因曰武牢漢楚之際項羽使海春侯曹咎守漢王破之咎自殺至宋武帝北平關洛置司州刺史理武牢魏使奚斤攻宋司州刺史毛德祖經二十日尅之城中傷者無血知其乏水潛作地道其穴猶存開皇十八年改成臯焉汜水縣大業十三年陷於王充武德四年討平充復於

縣理置鄭州貞觀七年移鄭州於營城以縣屬焉明慶二年改屬河南府垂拱四年改名廣武縣神龍元年復爲汜水開元二十九年自武牢城移於今理

黃河自鞏縣流入

汜水出縣東南三十二里浮戲山經武牢城東漢破曹咎於此

成臯故關在縣東南二里

旋門關在縣西南十里即八關之一

汜口去縣五十里今屬河陰

坂渚在縣東北三十五里初竇建德衆數十萬自于坂渚

結陣南屬鵲山以臨汜水太宗帥輕騎擊之賊衆大潰建

德竄於牛渚將軍白一讓生獲先是童謠云豆入牛口勢

不得久果敗於此牛口渚與坂渚邈迤相接

等慈寺在縣東七里王師旣破建德有詔於戰所起寺立

碑紀功焉令顏師古爲其碑文

元和郡縣圖志卷第五

元和郡縣圖志卷第六  
河南道二

陝虢觀察使 陝州 虢州 汝州

陝州陝郡都督府 開元戶四萬七千三百二十二  
元和戶八千七百

鄉五十六  
鄉六十六

今為陝虢觀察使理所

管州三 縣一十四 都管戶一萬一  
千九百四十七

墾田

陝州 虢州 汝州

禹貢豫州之域周為二伯分陝之地公羊傳曰自陝以東  
周公主之自陝以西召公主之又為古之虢國今平陸縣  
地是也戰國時為魏地後屬韓秦并天下屬三川郡漢為

弘農郡之陝縣自漢至宋不改後魏孝文太和十一年置陝州以顯祖孝文皇帝諱弘改為恒農郡十八年罷陝州孝武永熙中重置西魏文帝大統三年又罷周明帝復置屯兵於此以修齊隋大業二年復罷以其地屬河南郡義寧元年改置弘農郡武德元年改為陝州廣德元年改為大都督府

謹按陝城蒲牢與彭城滑臺壽陽懸瓠屢經攻守皆中夏之要云

州境東西二百五十二里南北隔河二百四十六里

八到

西至上都五百一十里  
東至東都三百五十里  
西南至虢州一百三十里  
北至絳州一百里  
西至潼關二百里  
西北至河中府二百四十五里

貢賦開元貢 柏子仁 瓜 蓼 賦 馳 絹 綿 絲 布

管縣八 陝縣 硤石 靈寶 夏縣 安邑 平陸

芮城 垣縣

陝縣望郭下本漢縣也歷代不改後魏改為陝中縣西魏去

中字周名帝於陝城內置峭郡以陝峭二縣屬焉開皇罷

郡以縣屬陝州陝原在縣西南二十五里

虢山在縣西二里臨黃河黃河自靈寶界流入後漢獻帝

東歸至陝議者欲令天子浮河東下太尉楊彪曰從此以東有三十六灘非萬乘所當從也乃止

曹陽墟俗名七里澗在縣西南七里獻帝東遷李傕郭汜追戰於弘農東澗天子遂露次於曹陽之墟謂此地也

州里城即古虢國城西征記曰陝縣周召分職處南倚山原北臨黃河懸水百餘仞臨之者皆為悼慄

故焦城在縣東北百步

太原倉在縣西南四里隋開皇二年置以其北臨焦水西俯大河地勢高平故謂之太原今倉實中周迴六里

太陽故關在縣西北四里後周大象元年置即茅津也春

秋時秦伯伐晉自茅津濟封嶠尸而還

徽伯故壘在縣南二里高觀使李徽伯戍陝周太祖攻之

徽伯築壘於此拒太祖

北利人渠開皇六年文帝建邛國公蘇威引橐水西北入城百姓賴其利故以為名

南利人渠東南自硤石界流入與北渠同時疏導

太楊橋長七十六丈廣二丈架黃河為之在縣東北三里貞觀十一年太宗東巡遣武侯將軍丘行恭營造

陝石縣

望

西至府五十里

本漢陝縣地屬弘農郡自漢至宋不改後魏孝文分陝縣

東界置崤縣明帝二年分陝崤二縣置崤郡隋文罷郡以  
崤縣屬陝州大業二年廢入陝縣義寧元年重置理陝  
石鳴貞觀中改名硤石縣

底柱山俗名三門山在縣東北五十里黃河中禹貢曰導  
河積石至於龍門又東至於底柱河水分流色山山見水  
中若柱然也又以禹理洪水山陵當水者破之以通河三  
穿既決河出其間有似於門故亦謂之三門漢成帝鴻嘉  
四年楊焉上言底柱之險可鐫廣之上乃令鐫之纔沒水  
中不能復去而令湍流沸怒爲害彌甚隋開皇三年遣倉  
部侍郎韋瓚自蒲陝以東募人能於洛陽運米四十石經

砥柱之險達於嘗平者免其征成貞觀十二年太宗東巡  
臨幸於此令魏徵勒銘

萃野在縣西十五里春秋時有神降於此

黃河西自陝縣界流入東經底柱水經注曰後魏景明中  
帝遣諫議大夫寇慈帥工三千人歲如修理以平河阻  
魏長城在縣北二十二里魏惠王十九年所築東南起崤  
山西北至河三十七里

靈寶縣

望

東北至府七十五里

本漢弘農縣自漢至後魏不改隋開皇十六年於今縣置  
桃林縣屬陝州天寶元年於縣南古函谷關尹真人宅掘



得天寶靈符遂改縣為靈寶

稠桑宅在縣西十里號公敗戎於桑田即此也

函谷故城在縣南十里秦函谷關城漢弘農縣也西征記

曰函谷關城路在谷中深險如函故以為名其中劣通東

曰十五里絕岸壁立崖上柏林蔭谷中殆不見日關去長

安四百里日入則閉雞鳴則開秦法也東自崤山西至潼

津通名函谷號曰天險所謂秦得百二也隗囂將王元說

囂曰請以一丸泥東封函谷關即此也

桃林塞自縣以西至潼關皆是也春秋時晉侯使詹嘉處

瑕守桃林之塞三秦記曰桃林塞在長安東四百里若有

軍馬經過好行則牧華山休息林下惡行則決河漫延人

馬不得過矣

涇津在縣西北三里義寧元年置關貞觀元年廢關置津

曹陽亭在縣東南十四里陳涉使周文西入秦秦使章邯

擊破之殺文於曹陽即此地也後曹公改為好陽

夏縣望西南至州一百二十里

本漢安邑縣地屬河東郡後魏孝文太和十一年別置安

邑縣十八年改為夏縣曰夏禹所都為名大業二年屬河

東郡武德元年又屬

虞州今陝州安邑縣是也

貞觀十七年隸絳州大定元年割屬陝州尋屬絳州乾元三年屬陝州

涑川在縣北四十里左傳晉侯使呂相絕秦曰伐我涑川按川東西三十里南北七里

安邑故城在縣東北一十五里夏禹所都也

安邑縣望 南至府一百一十里

本夏舊都漢以為縣屬河東郡開皇十六年屬虞州貞觀十七年屬蒲州乾元三年割屬陝州

雷首山一名中條山在縣南二十里其山有銀谷在縣西南三十五里隋及武德初並置銀冶監今廢

高堠原在縣北三十里原南坂口即古鳴條陌也湯與桀戰於此

鹽池在縣南五里即左傳郇瑕氏之地沃饒近鹽是也今按池東西四十里南北七里西入解縣界

平陸縣望 西南至州十七里

本漢大陽縣地屬河東郡後漢於此置河北郡領河北縣開皇十五年河北縣改屬蒲州貞觀元年又屬陝州天寶元年改為平陸縣

黃河在縣南二百步

吳山即吳坂也伯樂遇騏驎駕鹽車之地其坂自上及下

七山相重

傅巖在縣七里即傳說版築之處

閑原在縣西六十五里即虞芮爭田讓為閑田之所

顛軫坂今謂之軫橋在縣東北四十五里左傳曰冀為不道入自顛軫是也

瑟瑟窟在縣西北四十里

故虞城在縣東北五十里虞山之上晉侯使荀息假道於虞以伐虢即此城也

下陽故縣在縣東北二十里

芮城縣望 東至府一百里

本漢河北縣地屬河東郡自漢至後魏因之周明帝二年改名芮城屬河北郡其年又於此置虞州武帝建德一年於縣置芮州貞觀元年廢芮州以縣屬陝州 黃河在縣南二十里

本魏城春秋晉滅之賜畢萬是也在縣北五里

故芮城在縣西二十里古芮伯國也

垣縣 上 西南至州二百里

本漢縣屬河東郡後魏獻文帝皇興四年置邵郡及白水縣周明帝武成元年改白水為亳城縣大業三年改亳城為垣縣屬絳郡武德元年屬郡州九年屬絳州貞元三年

割屬陝縣枕黃河

垣城在縣西二十里

臯落城在縣西北六十里左傳曰晉侯使太子申生伐東

山臯落氏是也

號州

弘農

開元戶一萬七千七百四十三  
元和戶五千二百三十六

鄉

三十六

禹貢雍及豫二州之境周初為號國號有三北號今陝州

平陸縣東號今滎陽縣西號在今鳳翔扶風縣也魯僖二

年晉荀息假道於虞以伐號號亡仍為晉地其後三卿分

晉屬韓秦兼天下屬三川郡至漢武帝元鼎四年置弘農

郡後魏以獻文帝諱弘改為恒農郡孝武帝永熙三年分

為西恒農屬陝州周明帝復為弘農開皇三年廢郡以縣

屬陝州大業二年又改屬豫州三年又於弘農縣置弘農

郡義寧元年改為鳳林郡其年於盧氏縣置號郡武德元

年改為號州其年改鳳林郡為鼎州因鼎湖以為名貞觀

八年廢遂移號州於今理所

州境

東西南北

八到

西北至上都四百三十里  
東至東都四百五十三里

東至陝州一百三十三里  
西南至商州三百七十三里

西北至漳關一百三十里  
自關至華州一百二十里

西北至河中府一百八十里

貢賦

開元貢 天門冬 賦 絹 絁 綿

管縣六

弘農

盧氏

閿鄉

玉城

朱陽

湖城

弘農縣

本漢舊縣大業二年省三年復於今湖城縣西南一里置尋移就郡理其年移郡於鴻臚川縣亦隨徙即今縣是也義寧元年屬鳳林郡武德元年屬鼎州貞觀八年屬虢州方伯堆在縣東南五里宋奮武將軍魯方平所築鴻臚水過縣北十五里入靈寶界溉田四百餘頃盧氏縣上西北至州一百六十六里

本漢舊縣春秋時西虢之邑地有盧氏山或言靈敖得道於此山宜五穀可以避水災開皇三年改為虢州大業三年廢以盧氏屬河南郡武德元年又置虢州縣依舊熊耳山在縣南五十里禹貢導洛於此

閿鄉縣

望 東南至州一百里

本漢湖縣地屬京兆尹自漢至宋不改周明帝二年置閿鄉郡按閿鄉本湖縣鄉名閿古文聞字也說文從門受聲開皇三年廢閿鄉郡十六年移湖城縣於今所改名閿鄉縣屬陝州貞觀八年改屬虢州

秦山一名柰嶺在縣南五十里南入商州西南入華州一

高二千丈周迴三百餘里

黃巷坂在縣西北二十五里即潼關路也水經注曰河水自潼關東北流入側有長坂謂之黃巷坂東出通謂之函谷關岸高道隘車不得方軌魏武征韓遂馬超遼兵此地又潘岳西征賦曰遡黃巷以濟潼關亦謂此也

桃源在縣東北十里古之桃林周武王放牛之地也

黃河在縣北三里

金鳩水一名金節水漢戾太子亡匿之處

思子宮故城在縣東北二十五里漢武帝爲戾太子所築

曹公故壘在縣西二十五里魏武征韓遂馬超此地置壘又宋之入長安擅道濟王鎮惡濱帶河險大小七營皆此處

赫連氏京觀俗號平吳臺在縣西二十二里赫連勃勃使太原公昌攻劉裕將齡石於潼關克之築臺以表武功

王城縣 上西北至州六十里

本漢盧氏縣地屬弘農郡後魏正始二年分立石城縣廢帝改爲王城周武天和元年廢義寧元年重置貞觀八年移於今理

朱陽縣 上東北至州七十里

本漢盧氏縣屬弘農郡後魏太和十四年蠻人樊磨背梁歸魏立朱陽郡并朱陽縣令樊磨為太守大統三年分為朱陽郡屬東義州周武保定二年又省郡宣帝大象元年割盧氏西界以益朱陽縣開皇四年北屬陝州大業三年改屬虢州

湖城縣望 東南至州五十二里

本漢湖縣屬京兆尹即黃帝鑄鼎之處後漢改屬弘農郡至宋加城字為湖城縣

荆山在縣南即黃帝鑄鼎之處

夸父山在縣東南三十五里

湖縣故城在縣西南二里

汝州 臨汝 開元戶二萬六千五十三 元和戶一萬三千七十九

鄉六十 鄉三十七

禹貢豫州之域春秋時周王畿及鄭楚之地後屬於晉六國時復為韓魏之地秦屬三川郡在漢為河南郡之梁縣地也開皇四年自陸渾縣界移伊州理於此大業二年改為汝州三年改為宸城郡隋亂陷賊武德四年討平王充復為伊州貞觀八年改為汝州

州境 東西二百三里 南北二百五十二里

八到 西至上都九百八十里 西北至東都一百七十里

南至蔡州四百五十里 西南至鄧州四百七十五里

東至許州二百三十里

貢賦

管縣七 梁縣 臨汝 魯山 葉縣 襄城 龍興

陝城

梁縣上郭下

漢舊縣古蠻子邑戰國時謂之南梁以別大梁少梁即左傳云楚為一昔之期而襲梁反霍也

蠻中聚郡或蠻子國也在今郡西南俗謂之麻城又有陽人聚故城在今縣西秦滅東周徙其君於陽人聚即此地也漢末孫堅大破董卓軍於此高齊於此置汝北郡以備周

寇故城在今縣南下名王塢城隋煬帝改梁縣為承休縣屬汝州貞觀元年又改為梁縣汝水經縣南三里

廣成澤在縣西四十里後漢安帝永初元年以廣成遊獵地假與貧人元初二年鄧太后臨朝鄧騭兄弟輔政以為文德可興武功宜廢請寢蒐狩之禮於時馬融以文武之道並用作廣成贊以諷按此澤周迴一百里煬帝大業元年置馬牧於此

周承休城在縣東北二十六里漢封周後於此

黃陂在縣東二十五里南北七里東西十里隋朝修築有漑灌之利隋末廢乾封初有詔增修百姓賴其利焉



臨汝縣 上東南至州六十里

本漢梁縣地先天二年置貞觀七年刺史陸長源奏請割梁縣西界二鄉以益之仍自下縣昇為上縣

魯山縣 上北至州一百五十里

本漢魯陽縣古魯縣也屬南陽郡魯陽公與韓戰酣揮戈日為退三舍謂此地也後魏太和十一年孝文南巡置魯陽鎮十八年改鎮為荊州二十二年罷荊州置魯陽郡改魯陽縣為北山縣周改為魯山縣武德四年又於縣置魯州貞觀元年州廢以魯山屬伊州八年改伊州為汝州縣仍屬魯山在縣東北十里

魚齒山在縣東六十里春秋楚師伐鄭涉於魚齒之下山有涇水故言涉也

汝水出縣西一百五十里

人息山一名伏牛山

涇水出縣西大陌山世祖破王尋於昆陽士卒赴水死者甚衆涇水為之不流即此水也

温湯水在縣西四十里狀如沸湯可以熟米側有石銘曰女湯可已萬病

魯陽關水俗謂之三雖水經縣西七里其關三鷓鎮在縣西南十九里後周置以禦高齊亦名平高城

魯城在縣東北十七里高齊置以禦周

葉縣 縣西北至州二百一十里

本楚之葉縣春秋楚人遷許於此其後楚使沈諸梁尹之  
僭號稱公謂之葉公秦置郡縣隸於南陽後漢書謂之小  
長安言地沃人豐也開元三年於縣置仙州以漢時王喬  
於此得仙也二十六年廢仙州屬許州其年又割屬汝  
州

方城山在縣西南十八里楚屈完曰楚國方城以為城是  
也

黃成山一名苦菜山在縣西二十五里即長沮桀溺耦耕

處汝水西北流入去縣二十三里

昆陽故城在縣北二十五里後漢世祖破王邑尋之處燒  
車水在縣南二十四里世祖破王尋燒其輜重於此水濱

因名

襄城縣 望西北至州一百四十里

本秦舊縣漢因之屬潁川郡春秋襄王避叔帶之難出居  
鄭地汜在今縣南一里古汜城是蓋以周襄王嘗出居此  
故名襄城晉及後魏屬襄城郡開皇三年改郡為汝州以

縣屬焉大業二年汝州以縣屬許州開皇三年置仙州割  
襄城屬焉二十六年廢仙州復隸許州天寶七年又屬汝

州

汝水經縣南去縣一里縣理廢汝州城即古襄城楚靈所築後漢馮異據之降世祖莊子曰黃帝遊於襄城之野七聖皆迷遇牧馬童子而問道焉亦此地也

郟城縣

緊

西北至州八十里

本春秋時鄭地後屬楚人入於晉七國時又屬韓至漢以為縣屬潁川郡晉屬襄城縣郡後魏屬南陽郡高齊省隋煬帝大業三年移父城縣於今縣西北五里屬汝州四年改父城縣為郟城縣汝水西去縣七里扈澗水出縣北三十里

父城故城在縣東南四十里故殷時應國也在左傳楚大

城父城使太子建居之

龍興縣

上

西北至州九十里

本漢郟城縣地後魏太和十八年置汝南縣高齊天寶七年廢開皇十八年復置汝南隋末廢則天證聖元年置武興縣神龍元年改為龍興縣縣城本通鷓城即後漢賈復城也復南擊郟所築後魏太和二十三年孝文親征馬圈行至此城昏霧得三雖引路遂過南山故號通鷓城大龍山在縣東南三十五里劉累學擾龍遷於魯縣因以名山


汝水在縣北四十三里西南從梁縣界流入

湛水在縣東三十里春秋襄公十六年楚公子帥師戰於  
湛水是也

湍陽城一名應城在縣南二十五里後魏置滄陽縣開皇  
十年改為湛水武德四年又置湍陽縣

元和郡縣圖志卷第六





六  
禾  
君  
魚  
...

卷  
六

...

